

Resolución reitoral pola que se convoca os premios ao mellor Traballo Fin de Grao, Traballo Fin de Máster e Teses de Doutoramento en temáticas relacionadas coa Axenda 2030, a Cooperación ao Desenvolvemento e a Responsabilidade Social Corporativa (RSC) no curso académico 2025/2026.

O estudiantado da Universidade de Vigo, de conformidade co establecido no artigo 64.h) dos Estatutos da Universidade de Vigo, ten dereito a beneficiarse das distintas axudas e bolsas que a Universidade e outras institucións establezan ao seu favor, coa finalidade de que ninguén quede excluído do estudo por razóns económicas.

A Universidade de Vigo está comprometida coa implementación dos Obxectivos de Desenvolvemento Sostible (ODS) incluídos na Axenda 2030, especialmente daqueles vinculados coa cooperación ao desenvolvemento e coa responsabilidade social. Estes premios están orientados a recoñecer a calidade dos Traballos Fin de Grao (TFG), Traballos Fin de Grao (TFG) , Traballos Fin de Máster universitario (TFM) e Teses de Doutoramento centrados no estudo destas cuestións nas distintas ramas de coñecemento.

Unha vez vista a *Lei 9/2007 de subvencións de Galicia*, as disposicións aplicables da *Lei 38/2003, do 17 de novembro, xeral de subvencións* e as súas normativas de desenvolvemento.

En virtude das facultades que lle outorgan a *Lei orgánica 2/2023*, de 22 de marzo, do sistema universitario e o artigo 72 do *Decreto 13/2019, do 24 de xaneiro*, polo que se aprobaron os estatutos desta universidade,

ESTA REITORÍA RESOLVE:

1. Convocar, en réxime de concorrencia competitiva, premios ao mellor Traballo Fin de Grao (TFG), Traballos Fin de máster universitario (TFM) e Teses de doutoramento da Universidade de Vigo durante o curso académico 2025/2026 que serán xestionadas de acordo coas bases reguladoras que figuran no anexo I.
2. Publicar esta convocatoria e as bases que a regulan no taboleiro da sede electrónica sede.uvigo.gal/ e no [Portal de bolsas](#) da web da Universidade de Vigo.

Contra esta resolución, que esgota a vía administrativa, poderase interpoñer recurso contencioso administrativo perante a xurisdición contencioso-administrativa, no prazo de dous meses contados dende o día seguinte á súa publicación, de conformidade co disposto na *Lei 29/1998 do 13 de xullo, reguladora da xurisdición contencioso-administrativa*.

Así e todo, as persoas poderán optar por interpoñer un recurso de reposición, no prazo dun mes contado a partir do día seguinte ao da publicación da presente resolución, perante o mesmo órgano que a ditou. Neste caso, non se poderá interpoñer un recurso contencioso-administrativo namentres non recaia resolución expresa ou presunta do recurso de reposición, de acordo co disposto na *Lei 39/2015, de 1 de outubro, do procedemento administrativo común das administracións públicas*.

Vigo, na data de sinatura electrónica

A reitora

Por delegación RR 02/07/2026 (DOG 08/07/2026)

O vicerreitor de Transferencia, Innovación e Impacto Social

Rafael Comesaña Piñeiro



ANEXO I

BASES QUE REGULAN OS PREMIOS TFG, TFM E TESES DE DOUTORAMENTO EN TEMÁTICAS RELACIONADAS COA AXENDA 2030, A COOPERACIÓN AO DESENVOLVEMENTO E A RSC NO CURSO ACADÉMICO 2025/2026**1. OBXECTO**

A presente convocatoria está prevista no Plan estratéxico de subvencións da Universidade de Vigo como unha acción destinada a cumprir co obxectivo 27 consistente en “definir e poñer en marcha unha política integrada de responsabilidade social que englobe a cooperación internacional, o voluntariado, a igualdade, e sostibilidade e a atención á diversidade” a través do recoñecemento dos traballos de fin de estudos de grao e máster universitario e a teses de doutoramento realizados polo estudantado da Universidade de Vigo que se distingan por ser especialmente relevantes en temáticas relacionadas coa Axenda 2030, a cooperación ao desenvolvemento e a responsabilidade social.

a) Convócanse 6 premios para TFG distribuídos do seguinte xeito:

- Artes e Humanidades: 1
- Ciencias e Ciencias da Saúde: 2
- Ciencias Sociais e Xurídicas: 2
- Enxeñaría e Arquitectura: 1

b) Convócanse 6 premios para TFM distribuídos do seguinte xeito:

- Artes e Humanidades: 1
- Ciencias e Ciencias da Saúde: 2
- Ciencias Sociais e Xurídicas: 2
- Enxeñaría e Arquitectura: 1

c) Convócanse 6 premios de Teses de Doutoramento.

2. REQUISITOS DAS PERSOAS SOLICITANTES

Poderán solicitar este premio o estudantado que cumpra os seguintes requisitos:

- a) Posuír nacionalidade española, nacionalidade comunitaria acreditando a residencia continuada, ou de fóra da UE acreditando a residencia legal en España no prazo de presentación de solicitudes (non é suficiente o permiso de estadía por estudos).
- b) Cumprir unha das seguintes condicións:
- i. Ter superado o traballo fin de grao ou fin de máster universitario durante o curso 2025/2026 na Universidade de Vigo cunha cualificación igual ou superior a 8,5 puntos.
 - ii. Defender a tese entre o 1 de outubro de 2025 e o 30 de setembro de 2026 coa cualificación de Sobresánte CUM LAUDE.
- c) A temática do TFG/TFM/Tese de doutoramento debe estar relacionada con:
- **Axenda 2030:** todo tema relacionado con 17 obxectivos de desenvolvemento sostible: Fin da pobreza, Fame cero; Saúde e benestar; Educación de calidade; Igualdade de xénero; Auga limpa e saneamento; Enerxía accesible e non contaminante; Traballo



decente e crecemento económico; Industria, innovación e infraestrutura; Redución das desigualdades; Cidades e comunidades sostibles; Producción e consumo responsables; Acción polo clima; Vida submarina; Vida de ecosistemas terrestres; Paz, xustiza e institucións sólidas e Alianzas para acadar os obxectivos.

- **Cooperación ao desenvolvemento no marco da Axenda 2030:** cooperación financeira; cooperación técnica; axuda alimentaria e axuda humanitaria; principios e fundamentos xurídicos; política e xestión; cooperación e muller; dereitos humanos; ONG e outros actores da cooperación ONG; cooperación empresarial; cooperación universitaria.
- **Responsabilidade social corporativa no marco da Axenda 2030:** políticas públicas inclusivas; políticas públicas para a igualdade de xénero; inclusión de persoas con discapacidade no emprego público; definición de valores públicos; actuación responsable nas organizacións públicas e privadas; código ético nas organizacións públicas e privadas; deseño de plans de voluntariado nas organizacións públicas e privadas; mellora na xestión de prevención de riscos laborais.

Non poderán ter a condición de beneficiario/a as persoas nas que concorran algunha das circunstancias establecidas no artigo 13.2 da *Lei 38/2003 xeral de subvencións, de 17 de novembro*.

3. INCOMPATIBILIDADES

Os premios que se establecen nesta convocatoria serán incompatibles con calquera outro premio ou axuda da mesma natureza e para a mesma finalidade.

4. DOTACIÓN, CONTÍA E PAGAMENTO

1. Os fondos destinados a este premio irán con cargo á aplicación orzamentaria 2026 0000 121D 482.99 e o importe máximo do crédito orzamentario retido ascende a 9.000,00 € para o que se achega o correspondente certificado de existencia de crédito.
2. A contía individual máxima do premio será de **500 €** e tamén se lles outorgará un diploma. Esta contía está suxeita á retención que estableza a normativa tributaria nesta materia.
3. O pagamento do premio efectuarase mediante transferencia á conta bancaria en España indicada pola persoa beneficiaria na súa solicitude e da que deberá ser titular.

5. PRESENTACIÓN DE SOLICITUDES E DOCUMENTACIÓN

1 As persoas solicitantes deberán empregar o **formulario en liña** no seguinte enlace https://secretaria.uvigo.gal/uv/web/formularios/encuesta/cubrir_paso1/15530, **descargalo e presentalo na sede electrónica** da Universidade de Vigo (<https://sede.uvigo.gal>) a través da instancia xenérica estudantes (SXER) existente na sede ([enlace](#)) poñendo en **asunto** “Premios ó mellor TFG/TFM/TD en temáticas relacionadas coa axenda 2030”, achegando só o arquivo coa solicitude. Só se poderá presentar unha solicitude por persoa.

O modelo específico de presentación de solicitudes é de uso obrigatorio para as persoas interesadas neste procedemento (art. 66.6 da *Lei 39/2015 do 1 de outubro, do procedemento administrativo común das administracións públicas*). Se algunha das persoas interesadas presenta a súa solicitude de xeito presencial, se lle requirirá para que a emende a través da súa presentación electrónica.



2. O prazo de presentación das solicitudes comeza o día seguinte a publicarse esta convocatoria e finaliza o **8 de outubro de 2026, ás 23:59 horas** (hora peninsular española).
3. No formulario en liña achegarase a seguinte documentación (non haberá que subir a documentación á sede electrónica):
 - Memoria en formato PDF, máximo de 10 páxinas, nas que se describa as características do traballo.
 - Informe da persoa directora do traballo/tese de doutoramento acerca do cumprimento do requisito de que a temática do traballo ou tese está relacionada cos temas descritos na base 2.c desta convocatoria.
 - Unha copia en formato pdf do Traballo Fin Grao / Traballo Fin de Máster/Tese de doutoramento, ou enlace ao repositorio.
 - O estudantado que non teña nacionalidade española:
 - documento do Rexistro de cidadán/á da Unión Europea ou
 - tarxeta de identificación de estranxeiro/a na que conste o permiso de residencia (non é suficiente co permiso de estadía por estudos) de cidadán/a fóra da UE.

Tamén se lles poderá requirir que acheguen outra documentación que resulte necesaria para a correcta avaliación de requisitos e méritos alegados. O feito de non achegar a documentación requirida será causa de exclusión.

6. SELECCIÓN E RESOLUCIÓN

1. A Sección de Axudas e Bolsas, logo de rematar o prazo de presentación de solicitudes e unha vez examinadas estas e a documentación presentada, publicará a **listaxe provisoria de solicitudes admitidas e excluídas**, coa mención da causa de exclusión.

As persoas interesadas disporán dun prazo de **dez días hábiles** contados desde o día seguinte á publicación para emendar os erros, a falta de documentación e as causas de exclusión. Para tal fin deberán empregar o **formulario de alegacións** existente na Secretaría Virtual. De non presentar emenda entenderase que desiste da súa solicitude previa resolución ditada conforme á *Lei 39/2015 de 1 de outubro do procedemento administrativo común das administracións públicas*.

2. Unha vez revisadas as alegacións, a selección será efectuada pola comisión de avaliación de acordo cos seguintes criterios:
 - Temática e contidos claramente vencellados coa Axenda 2030, a Responsabilidade Social e a Cooperación ao desenvolvemento tal e como recolle o punto b) do apartado 2 desta convocatoria. Para calquera das tres temáticas valorarase a reflexión sobre a relación dos contidos do traballo coa Axenda 2030 no corpo do propio traballo: **máximo 40 puntos**.
 - Deseño do plan de traballo: obxectivos, preguntas, instrumentos de recollida e medición de datos, etc.: **máximo 30 puntos**.
 - Integración de contido multidisciplinario: **máximo 20 puntos**
 - Grao de aplicabilidade: **máximo 10 puntos**

No caso de resultar vacantes poderá ser adxudicado á persoa con maior puntuación das listas de agarda, ata esgotar o crédito orzamentario.



En caso de empate a prioridade será establecida segundo a cualificación do traballo académico.

3.A Comisión de selección está composta por:

Presidenta: Marta Sestelo Pérez, directora da Área de Emprego e Emprendemento

Vogais:

- Gonzalo Benito Méndez Martínez, profesor do Departamento de Xeociencias mariñas e ordenación do territorio.
- María Mercedes Varela Losada, profesora do Departamento de Didácticas especiais.
- Francisco Torres Pérez; profesor do Departamento de Dereito privado.
- Mar Fernández Cendón, técnica superior da Unidade de Igualdade.

Se por calquera causa, no momento en que a comisión avaliadora teña que examinar as solicitudes, algún ou algunha dos seus membros non puidese asistir, será substituída pola persoa que se designe para tal efecto. Este nomeamento deberá recaer noutra persoa da mesma unidade, órgano, entidade ou colectivo.

4. Unha vez efectuada a selección pola comisión, a Sección de Axudas e Bolsas publicará a **listaxe provisoria de persoas con premio concedido, denegado** coa mención da causa de denegación e a **listaxe de agarda** para o caso de existiren renuncias.

As persoas interesadas poderán presentar alegacións no prazo de **dez días hábiles**, contados a partir do día seguinte á publicación. Para tal fin presentarán o **formulario de alegacións** na Secretaría Virtual.

5. Unha vez que a comisión revise as alegacións, enviaralle a proposta ao vicerreitor de Transferencia, Innovación e Impacto Social quen adxudicará os premios mediante a correspondente resolución.

As persoas interesadas poderán entender desestimadas as solicitudes de non se ditar resolución expresa no prazo de 3 meses contados desde o día seguinte ao do remate do prazo de presentación de solicitudes.

A resolución conterá a listaxe definitiva de persoas con premio concedido e a súa contía, con premios denegado e a causa de denegación, e a listaxe de agarda para o caso de existiren renuncias.

6. As listaxes ás que se refire este punto así como a Resolución de adxudicación publicaranse no taboleiro da sede electrónica sede.uvigo.gal/ e no [portal de bolsas](#) da web da universidade, producindo os efectos da notificación de conformidade co artigo 45 da *Lei 39/2015, do 1 de outubro, do procedemento administrativo común das administracións públicas*.

As comunicacións individuais necesarias realizaranse ao enderezo electrónico sinalado na solicitude, sen que estas teñan a consideración de notificación.

7. RENUNCIA

A renuncia voluntaria deberá realizarse mediante o **formulario de renuncia** existente na secretaría virtual e presentado na sede electrónica da Universidade de Vigo <https://sede.uvigo.gal/> dirixido á Sección de Axudas e Bolsas, xunto co xustificante de reintegro da contía correspondente no caso de terse efectuado o pagamento. As renuncias aceptadas



darán lugar á perda dos dereitos económicos e a concesión do premio á seguinte persoa da lista de agarda previa resolución.

8. OBRIGAS

A persoas beneficiarias deberán cumprir as obrigas recollidas no artigo 14.1 da *Lei 38/2013, de 17 de novembro, xeral de subvencións*, que lle sexa de aplicación.

9. PROPIEDAD INTELECTUAL

A propiedade intelectual do traballo premiado e a propiedade material dos documentos que o integran corresponderán ao autor/a do mesmo.

A Universidade de Vigo poderá difundir con fins publicitarios o título, resumo e autor do traballo premiado.

10. REINTEGRO DOS PREMIOS E PERDA DO DEREITO DE COBRO TOTAL OU PARCIAL

Serán causas de reintegro e perda de dereito de cobro destes premios:

- Non cumprir os requisitos e obrigas recollidas na convocatoria.
- Ocultar datos, alteralos ou manipular a información solicitada.
- Incurrir nalgunha das causas de incompatibilidade establecidas nesta convocatoria.

A persoa beneficiaria que incorra nalgunha destas causas, estará obrigada a reintegrar á Universidade a cantidade indebidamente percibida.

11. TRANSPARENCIA

1. De conformidade co artigo 17 da *Lei 1/2016, do 18 de xaneiro, de transparencia e bo goberno*, e co artigo 15 da *Lei 9/2007, do 13 de xuño, de subvencións de Galicia*, a Universidade de Vigo publicará na súa páxina web oficial a relación das persoas beneficiarias e o importe das axudas concedidas, así como as sancións que puidesen impoñerse. Polo tanto, a presentación da solicitude leva implícita a autorización para o tratamento dos datos das persoas beneficiarias que resulte necesario para a referida publicidade.

2. En virtude do disposto no artigo 4 da *Lei 1/2016, do 18 de xaneiro, de transparencia e bo goberno*, as persoas físicas e xurídicas beneficiarias de subvencións están obrigadas a subministrar á Universidade de Vigo, logo de requirimento, toda a información necesaria para o cumprimento por aquela das obrigas previstas no título I da citada lei. Porén, non será necesaria a publicación cando o órgano que concede xulgue que se dan as previsións do artigo 15.2.d) da *Lei 9/2007, do 13 de xuño, de subvencións de Galicia*.

12. PROTECCIÓN DE DATOS

Información sobre a política de protección de datos en: <https://www.uvigo.gal/sites/uvigo.gal/files/contents/paragraph-file/2019-11/Texto %20proteccion datos para CONVOCATORIAS bolsas.pdf>

